

समे – 12:25 hrs.

<><><><><><>

### LG-Yuvatarang

उपराज्यपाल मनोज सिन्हा होरें नौजवानें अग्गे आह्वान कीता जे ओह भविक्ख लेई अपनी छमता ते ज्ञान कन्नै नमियां काहडां ते खोजां करन जिंदे नै समाज च क्रांतिकारी बदलाव आई सकै। उनें नोजवानें गी आखेआ जे ओह पूरी निष्ठा ते समर्पणभाव कन्नै कम्म करदे होई ना छड़ा अपने जीवन ते भविक्ख गी संवारन, सगुआं इयां करियै ओह पूरी दुनिया दे बेहतर भविक्ख गी दिशा देई सकदे न। कल कलस्टर युनिवर्सिटी जम्मू च आयोजित युवा तरंग कार्यक्रम दे समापन समारोह गी संबोधित करदे होई उनें नोजोआनें गी आखेआ जे विकसित समाज दे सुखने गी मूर्त रूप देने लेई ओह नमिएं कर्दे, मुल्लें ते लक्ष्यें गी तैयार करन।

<><><><><><>

### LG-Aerosol

उपराज्यपाल मनोज सिन्हा होरें कल सेंट्रल यनिवर्सिटी जम्मू च "एटमोसफेरिक एरोसोल, क्लाउड एंड क्लाइमेट साइंस" विशय पर आयोजित त्रीए एरोसोल विंटर स्कूल च हिस्सा लैता। एह आयोजन बदल फट्टने ते इस चाल्ली दिएं होरनें कुदरती करोपिएं सरबन्धी चुनौतिएं दे बारे च बक्ख-बक्ख पैहलुएं पर सोच-विचार करना हा। अपने संबोधनै च उपराज्यपाल होरें आखेआ कि वैज्ञानिकें दे सामने सभनें शा बड्डी चुनौती बदल फट्टने दिएं शेंकाएं पर सटीक ते पेशगी पेशगोई करना ऐ तां जे इस चाल्ली दिएं करोपिएं कारण होई सकने आहले नुकसान कोला बचेआ जाई सकै। उनें जोर देइयै आखेआ जे सरबन्धत सभनें हितधारकें गी किट्ठे रलियै कम्म करदे होई ऐसियां तकनीकां, संयंत्र, मशीनां ते उपकरण विकसित करने लोइचदे जिंदे'नै इस चाल्ली दिएं चुनौतिएं बारे समे कोला काफी पैहले प्रशासन ते जनता गी आगाह कीता जाई सकै।

<><><><><><>

## CM-Poonch Visit

मुख्यमंत्री उमर अब्दुल्ला होंरें कल पुंछ जिले च जारी विकास बाददे दे कम्में दी व्यापक समीक्षा कीती। इस बारें सद्दी दी इक उच्ची सतह दी बैठक दी अध्यक्षता करदे होई मुख्यमंत्री होंरें विकास कम्में लेई लाट कीती गेदिएं रकमें गी समेंसिर खर्च करने पर जोर दिता ते आखेआ जे कम्म जमीनी सतह पर तोड़ चढ़े दे लभने चाहिदे ते एहदे लेई नियमें कायदें दी सख्ती कन्नै पालमा कीती जानी लोड़चदी। मगरा उमर अब्दुल्ला होंरें पुंछ लेई 13 करोड़ 54 लख रुपे दी लागत आहले 5 महत्वपूर्ण विकास प्रोजेक्टें दा ई-सरिस्ते राएं उद्घाटन कीता जिंदे च मेंढर च देसी खद तैयार करने आहली इकाई ते हवेली ते सुरनकोट च केई पानी सप्लाई स्कीमां बी शामिल न।

<><><><><><>

## Dy CM Project

उपमुख्यमंत्री सुरेंद्र चौधरी होंरें आखेआ ऐ जे सरकार लोकें कन्नै कीते गेदे वायदें गी पूरा करदे होई इस गल्लै गी बी यकीनी बना करदी ऐ जे पूरे जम्मू-कश्मीर च लम्में चिरै थमां बकाया पेदिएं परियोजनाएं गी तौले तोड़ चाढ़ेआ जा। उपमुख्यमंत्री होंरें एह गल्ल कल श्रीनगर दे खानयार ते हजरतबल इलाकें दे दौरें दरान आकखी जित्थे ओह जारी विकास कम्में दी प्रगति ते रफ्तार दा मुआयना करने गितै गेदे हे। विकास प्रोजेक्टें दा मौके पर निरीक्षण करदे होई उपमुख्यमंत्री होंरें आखेआ जे सरकार अपने कीते दे हर इक वायदे गी पूरा करने लेई बचने बज्झी दी ऐ।

<><><><><><>

## National Milk Day

भारत च श्वेत क्रांति दे जनक खोआने आहले डॉ. वर्धिस कुरियन हुंदे सम्मान च हर बरें मनाए जाने आहले दुद्धै सरबन्धी राश्ट्री ध्याड़े दे मौके पर पशुपालन विभाग जम्मू दे एक्सटेंशन ते प्रचार सीगे आसेआ इक सेमीनार दा आयोजन कीता गेआ। इस कार्यक्रमें दरान डेयरी विकास ते करसानें दी सशक्तिकरण सने ग्रामीण अर्थ बवस्था गी तगड़ा बनाने च डेयरी

सहकारी समितिएं दी भूमिका पर बी लोs पाई गई। डेयरी विकास दे मिशन डरेक्टर नरेंद्र सिंह बाली होर इस कार्यक्रम दे मुख परौहने हे।

<><><><><><>

### Modern Looms

कश्मीर दिएं दस्तकारिएं ते हत्थखड्डिएं सरबन्धी विभाग नै कैपेक्स 2025-26 दे तैहत कलीन दी बुनाई आहले अपने सिखलाई केंद्रें लेई नमीं किस्मै दिएं 25 आधुनिक फौलादी खड्डिएं दी खुश-खरीद कीती ऐ। उन्न दे विकास आहले केंद्री बोर्ड दी व्हुल प्रोसेसिंग स्कीम दे तैहत मजूदा माली ब'रे लेई कपड़ा मंत्रालय आसेआ लाभार्थी बुनकरें आस्तै मंजूर कीती गेदी कलीन बनाने आहली 100 बाद्दू खड्डिएं दे अलावा एह 25 फौलादी खड्डियां दितियां गेइयां न। प्रेस लेई जारी इक बयान च इस बारै ब्यौरे सांझे करदे होई मैहकमे दे इक प्रवक्ता नै आखेआ ऐ जे इनें नमी फौलादी खड्डिएं गी इस चाल्ती कन्नै तैयार कीता गेदा ऐ जे इन्दे कन्नै अराम कन्नै बौहने दी बवस्था, लतें लेई थाह ते पिठ्ठ लेई ढासने दी बवस्था बी कीती गेदी ऐ।

<><><><><><>

### Mushroom-Cultivation

उधमपुर जिले दे करसान खास करियै बेरोजगार नौजवान खुम्बें दी रड़ दे राहें ना शड़ा खरी मती औंदन हासल करा करदे न, सगुआं खिते च इक नमीं कृशि क्रांति दी अगुवाई बी करा'रदे न। जिले दे मकामी करसानें लेई खुम्बें दी रड़, औंदन दा इक बड़डा जरिया बनी गेदी ऐ। ध्यानजोग ऐ जे मुआफक ढांचे ते सिखलाई दे राहें नियंत्रित ढंग्गे कन्नै खुम्बें दी रड़ पूरे ब'रे कीती जाई सकदी ऐ।

<><><><><><>

### Weather

जम्मू-कश्मीर दे मते सारे हिस्सैं च जंदी रातीं थमां ठंडू दा प्रकोप बधी गेदा ऐ ते टकोहदा करियै घाटी दे तापमान च गिरावट दर्ज कीती गई ऐ। आकाशवाणी दे जम्मू संवाददाता नै जानकारी दिती ऐ जे जम्मू प्रांतै च बी तापमान काफी झिगड़ा आई गेआ ऐ। जम्मू प्रांतै दे पदरे इलाकें च तापमान जम्मू च 8 इशारिया 7 डिग्री, कटड़ा च 8 इशारिया 5 डिग्री, कठुआ

च 8 इशारिया 2 ते जम्मू ब्हाई अड्डे पर रिकार्डिंग दे मताबक तापमान 10 इशारिया 1 डिग्री सेल्यिस दर्ज कीता गेआ ऐ, जिसलै जे प्रांतै दे उप्परले इलाके च तापमान, बनिहाल च 0 इशारिया 1 डिग्री, भद्रवाह च 0 इशारिया 4 डिग्री, बटोत च 4 डिग्री, रामबन च 4 इशारिया 1 डिग्री, राजौरी च 2 डिग्री, किश्तवाड़ च 3 इशारिया 4 डिग्री, रियासी च 6 इशारिया 9 डिग्री ते उधमपुर च 4 इशारिया 6 डिग्री सेल्यिस दर्ज कीता गेआ ऐ।

<><><><><><>